



**Komunikadu Imprensa**  
**Tribunál Distritál Baukau**  
**01 Marsu 2022**

**Tribunál revoga suspensaun ba pena prizaun iha krime VD no kondena pena prizaun efetiva tinan ida ba arguidu AdP ne'ebé repete ninia hahalok**

Iha 15 Feveiru 2022, Tribunál Distritál Baukau kondena pena efetiva tinan ida iha prizaun ba arguidu AdP ne'ebé provadu iha 10 Setembru 2021 repete krime violénsia doméstika hasoru nia feen boot durante períodu suspensaun ba pena prizaun nia ezekusaun, iha Munisípiu Baukau.

Antes ne'e, iha 04 Abril 2021, Tribunál kondena ona arguidu ho pena prizaun fulan neen suspende ba tinan ida ba krime ofensa ba integridade fízika simples ho natureza violénsia doméstika hasoru nia feen segundu. Maibé durante períodu suspensaun ba pena prizaun ne'e, iha 10 Setembru 2021, arguidu komete mós krime ofensa ba integridade fízika simples hasoru nia feen boot. Ho nune'e, tribunál konsidera arguidu falla hatudu ninia arrendimentu ba ninia hahalok no aplika pena efetiva tinan ida iha prizaun.

Alende ne'e, 26 Outubru 2021, Tribunál kondena mós arguidu ho pena prizaun fulan haat suspende ba tinan ida, tanba provadu komete krime ofensa ba integridade fízika simples hasoru arguidu nia feen boot. Krime ida ne'e mós sai nu'udar konsiderasaun ba tribunál hodi aplika pena efetivu maski la komete durante suspensaun ba pena prizaun.

“Sentensa ne'e atu eduka comunidade katak bainhira repete sira ninia hahalok violénsia doméstika maski ho tipu ofensa simples punível ba prizaun tuir lei penál aplikável. Tanba obrigasaun iha artigu 73 Kodigu Penál kona-ba revogasaun ba suspensaun, atu la tolera arguidu sira ne'ebé la hatudu sira nia arrendimentu ba krime sira ne'ebé tribunál kondena ona no la kumpri desizaun tribunal antes,” dehan Sra. Ana Paula Marçal, Diretora Ezekutiva JSMP.

JSMP apresia ho desizaun tribunál nian ba kazu ne'e, tanba kontinua hatudu sensibilidade forte ba kazu violénsia doméstika, liuliu atu proteze lezada husi krime violénsia doméstika. Bainhira arguidu sira ba kazu violénsia doméstika sira la hetan sentensa ida-ne'ebé adekua sei la prevene arguidu sira atu komete tan krime seluk iha futuru. JSMP observa katak iha kazu violénsia doméstika barak mak konklui deit ho suspensaun ba pena prizaun ne'ebé dalabarak comunidade no arguidu konsidera la'os

hanesan forma ida husi sentensa tanba la impoin obrigasaun ka dever adisionál ruma hodi kontrola arguidu-sira.

Kazu ida ne'e, prokuradór akuza katak iha 10 Setembru 2021, iha oras tuku 13:30 meiodia, arguidu hasoru malu ho lezada iha dalan no lezada husu osan ba arguidu atu hola sira nia nesidade uma laran maibé arguidu la fó no lezada husu nafatin. Ho nune'e, arguidu tuku dala ida iha lezada nia ulun, tuku dala ida iha lezada nia hasan parte karuk, tuku dala ida iha lezada nia tilun-hun parte loos no kontinua lori besikanu baku dala ida iha lezada nia ain-tuur parte karuk, tebe dala ida iha lezada nia hirus-matan no tebe dala iha lezada nia knosen parte loos halo lezada monu ba rai. Antes akontesimentu ne'e, arguidu ho lezada hela separa ona no arguidu la tau-matan labarik sira nia nesidade.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penal to'o tinan 3 ka multa, konjuga ho artigu 2, 3 no 35 letra (b) Lei Kontra Violénsia Doméstika.

Iha julgamentu arguidu konfesa faktu hotu iha akuzasaun no deklara katak antes ne'e tribunál kondena ona arguidu ba kazu hanesan ho suspensaun ba pena prizaun. Alende ne'e, lezada mós konfirma faktu hotu iha akuzasaun no deklara katak moris separa ona no arguidu la tau-matan ba lezada ho oan sira nia moris lor-loron.

Prokuradór konsidera arguidu provadu komete krime hasoru lezada bazeia ba konfisaun arguidu nian, konfirmasaun husi lezada no arguidu antes ne'e iha ona antensidente kriminál. Tanba ne'e, konsidera katak ho akontesimentu kazu ne'e hatudu katak arguidu la hatudu ninia arrependimentu durante iha suspensaun laran. Nune'e husu ba tribunál atu kondena arguidu ho pena prizaun tinan ida suspende ba tinan rua. Parte defeza konkorda ho alegasaun prokuradór nian.

Depoizde avalia faktu hotu, tribunál prova katak arguidu provadu komete krime hasoru lezada no arguidu la hatudu ninia arrependimentu. Tanba antes ne'e tribunál kondena ona arguidu ho suspensaun ba pena prizaun ba kazu anteriór. Tetu sirkunstánsia sira ne'e hotu tribunál konsidera katak pena ne'ebé ekuilibriu ho arguidu ninia hahalok mak pena prizaun no ikus tribunál konklui kondena arguidu ho pena prizaun tinan ida.

JSMP fiar katak tribunál iha konviksaun atu asegura protesau liuliu ba kazu violénsia hasoru feto. JSMP mós observa katak ne'e la'os primeiravés tribunál sira kondena arguidu iha kazu violénsia doméstika sira ho pena efetivu iha prizaun. Espera katak sentensa ne'e alende atu fó justisa ba lezada, sentensa ne'e mós sai hanesan lisaun ba arguidu no comunidade sira atu evita an hodi la komete tan krime violénsia doméstika iha comunidade.

Kazu ne'e rejista iha tribunál ho Nú. Prosesu: 0019/21.BCLGA. Julgamentu ne'e prezide husi juis singulár Dr. Florencia Freitas, prokuradór representa husi Dr. Bartolomeu de Araújo no arguidu hetan defeza husi Dr. Sidonio Maria Sarmiento.

Atu hetan infórmasaun kompletu bele kontaktu:

Ana Paula Marçal

Diretóra Ezekutiva JSMP

Email: [ana@jsmp.tl](mailto:ana@jsmp.tl)

Telefóne: 3323883 | 77040735

Website: <http://jsmp.tl>